

Prince Jacob (8 onns)

Prince Jacob ei il pli giuven da quater affons, tuts buobs. Sillas Filipinas vegn il fegl giuven ualti puppergnaus e survegn speciala atenziun.

Sia mumma Nerie (43 onns) conceda che Prince Jacob seigi siu affon preferiu. Mo quei munti buca ch'el astgi far e schar tgei ch'el vegli, mobein che sia mumma seigi sia educatura: „Jeu mirel che mes fegls passentien bia temps entras far pensums.“

Prince Jacob surpren pintgas lavurs a casa sco per exempel igl ir a cumprar en ellas stizuns dalla vischinonza.

El va ella tiarza classa dalla Gumacas Essential Missionary School. Ella schai directamein alla riva da Cozo. Mo quei ch'el fa sco biars en sia vegliadetgna il pli bugen ei far termagls.

Duront la pausa da miezdi pren el igl emprem tier sia mumma e tatta, che lavuran ella cantina dalla scola, sia tschavera. Suenten denton va el giu tiella riva e cuora entuorn malgrad la calira da miezgi.

Lu va el tiella ballontschera e sgola atras l'aria. Tuts san separticipar, tuts ein beinvegni, tuttina sche buobs ni mattatschas. Cun quei ch'ei dat mo ina ballontschera ella scola eis ella savens cumplettamein surcargada.

Lu va el tiella ballabeina e fa ir schi spert sco el sa, entochen che las cadeinas ein bunamein parallel cul plantschiu. Sia mumma pigliass matei tema sch'ella vesess el cheu silla ballabeina, mo per il cletg da Jacob eis ella per ordinari fatschentada en cuschina.

Sia mumma accumpogna el sin sia via da scola e puspei viers casa. Cu els vegnan a casa mida Prince Jacob siu resti, enstagl da l'uniforma da scola trai el en resti per far termagls. El mira tgi da ses amitgs che ha temps per far termagls. Els cuoran, fan da sezuppar ni dattan ballacanaster, giogan cun cullinas, cartas ed elastics. Entgins giugs fan els ensemen cullas mattatschas, auters mo dapersei.

„Mia mumma lai jugar mei tgei ch'jeu vi, mo nus astgein buc ir memia lunsch naven da casa“, declara Jacob.

Nerie vul che ses affons seigien ella vischinonza per ch'ella sappi survegilar els. Ella educescha ses affons persula dapi ch'ella ei separada da siu um. Quel ha bandunau il tenercasa e viva ensemen cun in'otra dunna.

En ses giuvens onns ha Prince Jacob aunc buc idea da dretgs d'affons. Mo el recloma buca co sia mumma educescha el e ses frars.

A casa dierman tut ils buobs cun lur mumma ella medema stanza, dano il pli vegl che studegia en in auter liug.

Prince Jacob di ch'el vegli daventar in di polizist. „Jeu vi gidar ils carstgauns.“ Che polizists fan quei, ha el viu ella televisiun.